

ngakau. He reo nui, he reo kotahi, te reo o te pakeha hei akiaki i te Kawanatanga kia tukuna te ture kia tino kakati nga niho. Ko taua ko te Maori, ko wai taua, kia tu taua ki te whakararuraru i nga hiahia o te pakeha? Kua raungaiti taua i te ao. Ko te ture e reiti nei i te Maori kotahi mo te whenua o te tokomaha he ture he; e reiti nei i te tangata i te mea kaore ano te whenua kia wehewehe; e reiti nei i te tangata mo te whenua katoa ahakoa kei tetahi wahi noa ia e noho ana; e reiti nei i te whenua i te mea kahore he moni i te puta hei whakapai; e reiti nei i te whenua Maori i te mea kahore he rori e puta ana ki taua whenua—kaore hoki nga kaunihera e hihiko ki te mahi rori mo nga whenua Maori. He he katoa enei ture, kei te takahi i te kaupapa Ingarihi o tenei mea o te tika. Ki te whakangaua te ture reiti i te mea kaore ano he huarahi moni mo te whenua ko tona tikanga he muru i te whenua, he patu i te Maori i te mea, e hereherea ana ona ringaringa.

Kaore au i te tino whakaae ki te kupu e mea nei i te whakaetanga a nga rangatira Maori ki te Tiriti o Waitangi he whakaetanga tena ki nga ture katoa a te pakeha i te mea kaore ano kia rite te ahua o te Maori ki to te pakeha. Me he mea he tika tenei kupu kaati i whakaae kapo te Iwi Maori, no te mea he ture tuturu no te Ingarihi kia kaua te tangata e whakaae kapo. Ko tona ahua ko te wahi pai o te ture i whakaaturia, ko nga wahi kino i hunaia. Kahore o tatou tipuna i mohio i to ratou tuhinga ki te Tiriti o Waitangi he whakaetanga tera na ratou ki te ture reiti.

Ko tenei to Te Kooti, Minita Maori, tona whakaaro. I rongotou aku taringa ki tona reo i te hui i Wai-o-Matatini. Ko Te Kooti to taua pa-tuwatawata, hei hoa mona ko o taua mema Maori me nga mema pakeha whakaaro whanui, whakaaro rangatira.

(*Taria te mutunga.*)

NGA MANAAKI I TE TOA TAKITINI.

TENEI kua tae mai te aroha a Ngati Porou ki *Te Toa Takitini* e rima-tekau panna. Kia ora a Ngati Porou mo tenei aroha nui a koutou ki ta tatou taonga. Ko koutou ano ko te iwi kua whakawhiwhia ki nga matauranga, kei te kite mai i nga painga e puta ana mo te iwi Maori, i runga i nga whakahaere o *Te Toa Takitini*. Ma tenei wairua i a koutou na, ka tupu ai nga mahi nui. Ko koutou me Te Arawa nga iwi e manaaki mai nei i ta tatou pepa, ki te kai, ki te korero. Kia ora tonu koutou.

Tenei hoki te mihi nei ki a Mrs. Woodbine Johnson o Turanga mo tona aroha ki *Te Toa Takitini*, ara e rima panna. Kia ora e kui mo tenei manaaki nui au i ta koutou mokai.

Mo te mare kaore he rongoa hei rite ki te WOODS' GREAT PEPPERMINT CURE.